

## EXEGESIS.

**H**Actenus explicata sunt indicia generalia, & omnibus delictis communia, in posterum traduntur indicia specialia quæ in singulis criminibus reperiuntur. Ubi notandum, 1, Quod singula sint intelligenda in tota sua latitudine, prout nimirum debitis adminiculis sunt munita; sic ut quandoque unus articulus plura indicia comprehendat, quæ non separatim, sed conjunctim sumi debent ad producendum torturæ effectum. Dicitur autem unum indicium ab Imperatore per aggregationem, quia ex multis indiciis est coacervatum. 2, Indicia hæc specialia itidem pro varietate circumstantiarum varia esse ac difformia, nec omnia enumerari posse certum est; attamen cum frequentium quorundam delictorum indicia, quæ plerumque sese exerunt, & de veritate facti aliquam fidem facere possunt judici, Sanctio nostra criminalis exprimat, quibus & alia ab interpretibus sunt addita; ideò ordinem præscriptum ab Imperatore sequemur.

Et primum agitur de *Homicidii clandestini indiciis legitimis*. Visus cum armis aut vestimentis sanguine conspersis in ipso vel propinquo loco homicidii perpetrati, & eò tempore, quò homo occisus est, tum reus satis suspectus est, seu prægnanti suspitione gravatur, ut proinde torturæ possit subijci. Quod etiam indicium Menoch. l. 2. Cent. 3. casu. 270. n. 18. p. 528. de A. I. Qu. vocat *Proximum*: Farinac. l. 1. tit. 5. qu. 52. n. 50. p. 794. Oper. Crimin. illud appellat *Vehementissimum*. Item quando diffamatus fugit cum cultello cruento è loco, in quo homicidium vel illò temporis articulo est commissum, vehementissimum est indicium ad torturam, modo constiterit cultellum ad fugientem & suspectum pertinere. Ratio desumitur ex facti qualitate: quandoquidem homo est interfectus: delati gladius & cultellus in isto loco & tempore, quò homicidium perpetratum est, reperitur sanguinolentus, & hoc à testibus juratis ita affirmatur, inde certum & efficax desumitur indicium ad torturam. Farin. d. quest. n. 51. p. 794. Oper. Crimin. Tria itaque hæc copulari debent, ad hoc, ut reus torturæ possit subijci. 1. *Ut visus sit in loco commisso homicidii*, vel etiam loco propinquo. 2. *Tempore perpetrati homicidii*, id est, ut illò temporis momento, quò homicidium est commissum, suspectus ibi visus fuerit. 3. *Cum gladio seu telo cruento*: quod certè indicium urgentissimum est: nam quâ ratione gladius foret cruentus, nisi eò fuisset vulnus alteri inflicium,